



სსიპ კოლეჯის „ერქვანი“ სახანძრო უსაფრთხოების წესი

მუხლი 1. ზოგადი დებულებანი

1. სსიპ კოლეჯი „ერქვანი“ (შემდგომში ”კოლეჯი”) მდებარე მისამართზე: ქ.ამბროლაური, ვაჟა-ფშაველას ქ. №10, სახანძრო უსაფრთხოების წესი (შემდგომში ”წესი”) შემუშავებულია „სამოქალაქო უსაფრთხოების შესახებ“ საქართველოს კანონის, „სახანძრო უსაფრთხოების წესებისა და პირობების შესახებ ტექნიკური რეგლამენტის დამტკიცების თაობაზე“ საქართველოს მთავრობის 2015 წლის 23 ივლისის №370 დადგენილების და კოლეჯის წესდების საფუძველზე.
2. წინამდებარე წესი წარმოადგენს ნორმატიულ სამართლებრივ აქტს, რომელიც ადგენს ქცევის სავალდებულო წესებს, რომლის დაცვა და შესრულება სავალდებულოა კოლეჯის თანამშრომლებისათვის, სტუდენტებისათვის და კოლეჯის ვიზიტორებისათვის.

მუხლი 2. ხანძარსაწინააღმდეგო უსაფრთხოების უზრუნველყოფა

1. სახანძრო უსაფრთხოების წესების დაცვასა და შესრულებაზე კონტროლს ახორციელებს კოლეჯის დირექტორი.
2. სახანძრო უსაფრთხოების წესების დაცვაზე მონიტორინგს ახორციელებს და წინამდებარე წესით დადგენილი ღონისძიებების შესრულება ევალება კოლეჯის მატერიალური რესურსების კოორდინატორს და კოლეჯის უსაფრთხოების სპეციალისტს(ასეთის არსებობის შემთხვევაში).
3. კოლეჯში ყველა სართულზე თვალსაჩინო ადგილას გამოკრული არის საევაკუაციო გეგმა, ევაკუაციის პროცედურები, რომლის შესაბამისად საჭიროების შემთხვევაში მოხდება შენობის უსაფრთხო დატოვება.
4. კოლეჯი აღჭურვილია შესაბამისი ხანძარსაწინააღმდეგო ინვენტარით, ცეცხლმაქრით, რომელიც განათავსებულია სპეციალურად გამოყოფილ ადგილებში და მისი გამოყენების ინსტრუქცია გამოკრულია აღნიშნულ ინვენტართან და ახსნილია კოლეჯის სტუდენტებისა და პერსონალისათვის.
5. კოლეჯის მთელ ტერიტორიაზე (შენობასა და ეზოში) აკრძალულია თამბაქოს/ელექტრონული სიგარეტის მოხმარება.
6. ხანძარსაწინააღმდეგო დაცვის სისტემების ტექნიკური საშუალებების ეფექტური მუშაობის უზრუნველსაყოფად, კოლეჯის დირექტორი ნიშნავს ხანძარსაწინააღმდეგო დაცვის სისტემების ექსპლუატაციაზე, ტექნიკურ მომსახურებაზე, მათ შეკეთებაზე, დაცვასა და გამოყენებისათვის მზადყოფნაზე პასუხისმგებელ პირს.
7. კოლეჯის დირექტორი განსაზღვრავს ხანძრის ჩაქრობის პირველადი საშუალებების შენახვასა და მოქმედებისთვის მზადყოფნაზე პასუხისმგებელ პირს.
8. სახანძრო უსაფრთხოების უზრუნველყოფაზე პასუხისმგებელი პირები ვალდებული არიან დროულად და სათანადოდ უზრუნველყონ სახანძრო უსაფრთხოების მოთხოვნების შესრულება.
9. პასუხისმგებლობა წინამდებარე წესით დადგენილი სახანძრო უსაფრთხოების მოთხოვნების დაცვაზე უშუალოდ სამუშაო ადგილებზე ეკისრებათ კოლეჯის თანამშრომლებს.
10. თანამშრომლები, რომლებსაც ევალებათ კოლეჯში ხალხმრავალი ღონისძიებების ჩატარება, ვალდებული არიან ღონისძიებების დაწყებამდე ყურადღებით დაათვალიერონ სათავსები და დარწმუნდნენ მათ უსაფრთხოებაში ხანძარსაწინააღმდეგო თვალსაზრისით.



11. კოლეჯის ყველა თანამშრომელი ვალდებულია:

- ა) დაიცვას სახანძრო უსაფრთხოების მოთხოვნები;
- ბ) სამუშაოს დასრულების შემდეგ გამორთოს პერსონალური კომპიუტერი ან/და სხვა ელექტროხელსაწყოები;
- გ) სამუშაოს დამთავრების შემდეგ, ოთახის დაკეტვის წინ, ჩაატაროს დათვალიერება, გამორთოს ელექტროხელსაწყოები და განათება;
- დ) დაიცვას უსაფრთხოების ზომები ადვილადააღებადი და წვადი სითხეების და აირების, სხვა ხანძარსაშიში ნივთიერებების, მასალების და მოწყობილობების გამოყენებით სამუშაოების შესრულებისას;
- ე) იცოდეს ხანძრის დროს ევაკუაციის გეგმა და ცეცხლმაქრების განთავსების ადგილები;
- ვ) ევაკუაციისას შენობიდან გასვლა მოახდინოს ევაკუაციის გეგმის შესაბამისად და არ გამოიყენოს ლიფტი;
- ზ) იცოდეს ცეცხლმაქრებით სარგებლობის ხერხები;
- თ) არ ჩახერგოს საევაკუაციო გზები და გასასვლელები;

12. თანამშრომლებს ეკრძალებათ:

- ა) სათავსებში ადვილადააღებადი, წვადი და ფეთქებადი ნივთიერებების შენახვა;
- ბ) თამბაქოს მოწევა კოლეჯის ტერიტორიაზე (შენობასა და ეზოში);
- გ) კოლეჯის შენობაში ქაღალდების ან სხვა ადვილად ააღებადი ნივთიერებების ღია მდგომარეობაში დაყრა;
- დ) კოლეჯში ღია ცეცხლის გამოყენება;
- ე) არაქარხნული წესით დამზადებული და გაუმართავი ელექტროხელსაწყოებისა და ელექტრო ინსტრუმენტების გამოყენება;
- ვ) ქსელში ჩართული ელექტროხელსაწყოების უმეტესაწყოოდ დატოვება.

მუხლი 3. მატერიალური რესურსების კოორდინატორი, და კოლეჯის უსაფრთხოების სპეციალისტის ვალდებულება(ასეთის არსებობის შემთხვევაში):

1. ხანძრის გაჩენის შემთხვევაში, მატერიალური რესურსების კოორდინატორის და უსაფრთხოების სპეციალისტის მოქმედებები უნდა იყოს მიმართული ადამიანთა უსაფრთხოების უზრუნველყოფასა და მათ დროულ ევაკუაციაზე.
2. სახანძრო უსაფრთხოების უზრუნველყოფისთვის კოლეჯის მატერიალური რესურსების კოორდინატორი და მის დაქვემდებარებაში მყოფი, ტექნიკური და დამხმარე პერსონალი ვალდებულია:

ა) იცოდეს ელექტროენერგიის მოწოდების წყარო, მისი საერთო გამომრთველის ადგილმდებარეობა, ხოლო ხანძრის ან ასეთის წარმოქმნის საშიშროების შემთხვევაში, დაუყოვნებლივ გათიშოს ელექტროენერგიის მოწოდების წყარო.

ბ) იცოდეს ცეცხლმაქრი სისტემების გამოყენება, მათი ვარგისიანობის ვადა და შევსების დრო, ასევე პერიოდულად უნდა ამოწმებდეს ცეცხლმაქრების მდგომარეობას.

გ) მონაწილეობა მიიღოს ხანძარსაწინააღმდეგო ინსტრუქტაჟის პროცესში.

დ) შენობიდან გასვლის წინ შეამოწმოს კოლეჯის მთლიანი შენობა, გამორთოს ელექტროენერგია, გამართულ მდგომარეობაში დატოვოს სიგნალიზაცია.



ე) ხანძრის გაჩენის შემთხვევაში, მათი მოქმედება მიმართული უნდა იყოს ადამიანთა უსაფრთხოების უზრუნველყოფასა და მათ დროულ ევაკუაციაზე; დროულად მიუთითოს ადამიანებს საევაკუაციო გასასვლელ(ებ)ისკენ.

ვ) მის ხელთ არსებული ყველა საშუალების გამოყენებით განახორციელოს ცეცხლის ქრობა და მისი ლოკალიზება, თუ ეს არ აღემატება მის შესაძლებლობებს; გამოიძახოს სახანძრო-სამაშველო სამსახური, ასეთის საჭიროების შემთხვევაში.

ზ) ადგილზე მოსულ მაშველებს მოახსენოს საქმის ვითარების შესახებ და მათთან ერთად განაგრძოს ცეცხლის ქრობა. ხანძრის ჩაქრობის ხელმძღვანელს მიაწოდოს ინფორმაცია შენობის კონსტრუქციული თავისებურებების, სათავსებში არსებული ნივთიერებებისა და მასალების ხანძარსაშიში თვისებების შესახებ.

მუხლი 4. ხანძრის შემთხვევაში კოლეჯის თანამშრომლების და პროფესიული სტუდენტების(შემდგომში სტუდენტი) მოქმედების წესი:

1. კოლეჯში, ხანძრის ან წვის ნიშნების (დაკვამლიანების, დამწვრის სუნის, ტემპერატურის აწევის და ა.შ.) აღმოჩენის შემთხვევაში, კოლეჯის თითოეული თანამშრომელი და სტუდენტი ვალდებულია:

ა) შეწყვიტოს სამუშაო (სწავლება), დაუყოვნებლივ შეატყობინოს აღნიშნულის შესახებ სახანძრო-სამაშველო სამსახურს ტელეფონით “112” (ამასთან აუცილებელია დაასახელოს ობიექტის მისამართი, ხანძრის გაჩენის ადგილი) და აუცილებლობის შემთხვევაში საავარიო ღილაკით ჩართოს განგაშის ხმოვანი სიგნალი, უახლოესი ჩართვის ღილაკით;

ბ) შეძლებისდაგვარად მონაწილეობა მიიღოს ადამიანთა ევაკუაციაში, მატერიალურ ფასეულობათა გადარჩენასა და ხანძრის ჩაქრობაში;

გ) გათიშოს დენის წყაროდან სათავსოში არსებული, მასზე განპიროვნებული ელექტროდანადგარები და ხელსაწყოები;

დ) მომხდარის თაობაზე შეატყობინოს კოლეჯის ადმინისტრაციას, ასევე აცნობოს გარშემო მყოფ მოსამსახურეებს;

ე) საშიშროების საერთო განკარგულების მიღებისას დატოვოს კოლეჯი.

2. კოლეჯში ხანძრის შემთხვევაში ევაკუაცია ხორციელდება N1 დანართით გათვალისწინებული ინსტრუქციის მიხედვით.

მუხლი 5. ხანძარსაწინააღმდეგო ინსტრუქტაჟი

1. ხანძარსაწინააღმდეგო ინსტრუქტაჟი უტარდება კოლეჯის თანამშრომლებს სახანძრო უსაფრთხოების ძირითადი მოთხოვნების, ხანძარსაწინააღმდეგო დაცვის საშუალებების, აგრეთვე ხანძრის გაჩენის შემთხვევაში მათი ამოქმედების წესის შესწავლის მიზნით.

2. ხანძარსაწინააღმდეგო ინსტრუქტაჟი ტარდება კოლეჯის დირექტორის ან კოლეჯის დირექტორის მიერ განსაზღვრული სახანძრო უსაფრთხოებაზე პასუხისმგებელი პირის მიერ, კანონმდებლობით დადგენილი მოთხოვნების გათვალისწინებით, ამ წესის შესაბამისად.

3. ხანძარსაწინააღმდეგო ინსტრუქტაჟის ჩატარება ითვალისწინებს კოლეჯის თანამშრომელთა გაცნობას:

ა) კოლეჯის ტერიტორიის, შენობის, მათ შორის, საევაკუაციო გზების, შიდა და გარე წყალსადენის, ხანძრის შესახებ მაუწყებლობის სისტემების მიმართ დადგენილ მოთხოვნებსა და ადამიანთა ევაკუაციის პროცესის მართვასთან;

ბ) ხანძარსაშიში სამუშაოების ჩატარების წესებთან;

გ) ხანძრის დროს თანამშრომელთა ვალდებულებებსა და მოქმედებებთან, სახანძრო-სამაშველო სამსახურის გამოძახების წესებთან, ხანძრის ჩაქრობის საშუალებების და სახანძრო ავტომატიკის დანადგარების გამოყენების მოთხოვნებთან.



4. ხასიათის და ჩატარების პერიოდულობიდან გამომდინარე, დადგენილია შემდეგი სახის ხანძარსაწინააღმდეგო ინსტრუქტაჟი: საწყისი, განმეორებითი და მიზნობრივი.
5. საწყისი ხანძარსაწინააღმდეგო ინსტრუქტაჟი უტარდება:
 - ა) კოლეჯში ახლად მიღებულ ყველა თანამშრომელს, მიუხედავად განათლებისა და პროფესიით (თანამდებობაზე) მუშაობის სტაჟისა;
 - ბ) კოლეჯში სტაჟირებაზე/პრაქტიკაზე მიღებულ პირებს.
6. საწყისი ხანძარსაწინააღმდეგო ინსტრუქტაჟი მოიცავს შემდეგ საკითხებს:
 - ა) მონაცემებს ობიექტის (წარმოების) ხანძარ და ფეთქებადსაშიში პირობების სპეციფიკის და თავისებურებების შესახებ;
 - ბ) თანამშრომლების მოვალეობებს და პასუხისმგებლობას სახანძრო უსაფრთხოების მოთხოვნების დაცვაზე;
 - გ) ობიექტის ხანძარსაწინააღმდეგო რეჟიმის გაცნობას;
 - დ) ხანძარსაწინააღმდეგო რეჟიმის დაცვის თაობაზე ბრძანებების, სახანძრო უსაფრთხოების ინსტრუქციების, სამუშაო ადგილზე, საცხოვრებელ სათავსებში მომხდარი ან სავარაუდო ხანძრების ძირითადი მიზეზების გაცნობას;
 - ე) სახანძრო პროფილაქტიკის ზოგად ზომებს და ხანძრის ჩაქრობაზე მიმართულ ძირითად მოქმედებებს.
7. განმეორებითი ხანძარსაწინააღმდეგო ინსტრუქტაჟი უტარდება კოლეჯის მოქმედ თანამშრომლებს არანაკლებ წელიწადში ერთხელ, პირველადი ხანძარსაწინააღმდეგო ინსტრუქტაჟის პროგრამის მიხედვით.
8. განმეორებითი ხანძარსაწინააღმდეგო ინსტრუქტაჟის დროს მოწმდება თანამშრომლების მიერ ობიექტში დადგენილი ხანძარსაწინააღმდეგო რეჟიმის მოთხოვნების, ხანძრის ჩაქრობის პირველადი საშუალებების, ევაკუაციის გზების გამოყენების ცოდნა. განმეორებითი ხანძარსაწინააღმდეგო ინსტრუქტაჟი ტარდება:
 - ა) სახანძრო უსაფრთხოების ნორმატიულ აქტებში ცვლილებების შეტანის და ახალი დოკუმენტების შემუშავების შემთხვევაში;
 - ბ) კოლეჯში ინფრასტრუქტურის, მოწყობილობის, სისტემების მოდერნიზაციის შემთხვევაში;
 - გ) თანამშრომლების მიერ სახანძრო უსაფრთხოების მოთხოვნების დარღვევისას, რომლებმაც გამოიწვიეს ან შეიძლება გამოიწვიონ ხანძარი;
 - დ) სხვა საგანმანათლებლო დაწესებულებაში ავარიების, ხანძრების შესახებ ცნობების მიღებისას;
 - ე) თანამშრომლების მიერ სახანძრო უსაფრთხოების მოთხოვნების არასათანადო ცოდნის შემთხვევაში.
9. მიზნობრივი ხანძარსაწინააღმდეგო ინსტრუქტაჟი ტარდება პროფესიული სტუდენტებისა და მოსწავლეების მონაწილეობით მასობრივი (50 ადამიანზე მეტი) ღონისძიებების ჩატარებისას და კანონმდებლობით დადგენილ სხვა შემთხვევებში.
10. მონაცემები საწყისი, განმეორებითი და მიზნობრივი ინსტრუქტაჟის გავლის შესახებ შეიტანება „სახანძრო უსაფრთხოების ინსტრუქტაჟების აღრიცხვის ჟურნალში“ (დანართი N2), იმ პირების ხელმოწერით, რომლებმაც ჩაატარეს და გაიარეს ინსტრუქტაჟი.
11. კოლეჯში არანაკლებ ნახევარ წელიწადში ერთხელ ტარდება ხანძრის დროს პერსონალის მოქმედებების გავარჯიშება შენობის ხანძარსაწინააღმდეგო დაცვის სისტემის ყველა ელემენტის გამართული მუშაობის შემოწმების პარალელურად.

მუხლი 6. პასუხისმგებლობა სახანძრო უსაფრთხოების წესების დარღვევისათვის

1. კოლეჯის პერსონალი და პროფესიული სტუდენტი ვალდებულია მკაცრად დაიცვას დადგენილი სახანძრო უსაფრთხოების წესი და დაემორჩილოს მატერიალური რესურსების, მის დაქვემდებარებაში მყოფი სახანძრო უსაფრთხოებაზე პასუხისმგებელი პირებისა და კოლეჯის უსაფრთხოების სპეციალისტის მითითებებს;



2. პირის მიმართ, რომელიც დაარღვევს სახანძრო უსაფრთხოების წესებს, გამოიყენება კოლეჯის შინაგანაწესით გათვალისწინებული შესაბამის ზომები.

დანართი N1

ხანძრის პირობებში ევაკუაციის უზრუნველყოფისათვის პერსონალის მოქმედებების ინსტრუქცია

№	მოქმედების დასახელება	მოქმედების წესი და თანმიმდევრობა	შემსრულებელი
1	შეტყობინება ხანძრის შესახებ	სახანძრო-სამაშველო სამსახურის გამოძახება ნომერზე - “112”	პირი, რომელმაც აღმოაჩინა ხანძარი
2	მაუწყებლობა ხანძრის შესახებ	ხანძრის შესახებ ინფორმაციის მიწოდება შენობაში მყოფი ადამიანებისათვის	შენობის დაცვის თანამშრომელი და ან სახანძრო სამაშველო ჯგუფი
3	ადამიანთა ევაკუაცია შენობიდან	ადამიანების ორგანიზებული გაყვანა ევაკუაციის გეგმის მიხედვით	საევაკუაციო ჯგუფი
4	ევაკუირებულთა აღრიცხვა	ევაკუირებული ადამიანების თავმოყრა სპეციალურად გათვალისწინებულ თავშეყრის ადგილზე, მათი აღრიცხვა, ვინაობის და რაოდენობის ფიქსირება	საქმისწარმოებისა და რეესტრის წარმოების სამსახური
5	ხანძრის ჩაქრობა და ქონების ევაკუაცია	ხანძრის ჩაქრობის სამუშაოების ორგანიზება მისი აღმოჩენის მომენტიდან სახანძრო-სამაშველო დანაყოფის მისვლამდე; შეძლებისდაგვარად მატერიალურ ფასეულობათა ევაკუაცია	სახანძრო სამაშველო ჯგუფი
6	სახანძრო-სამაშველო დანაყოფის დახვედრა	სახანძრო-სამაშველო სამსახურების დახვედრა, ხანძრის ჩაქრობის ხელმძღვანელისათვის შექმნილი ვითარების შესახებ ინფორმაციის გადაცემა	ადმინისტრაცია, მატერიალური რესურსების სამსახური,

დანართი 2

განყოფილება სამსახური

ხანძარსაწინააღმდეგო ინსტრუქტაჟის აღრიცხვის ჟურნალი

დაიწყო „____“ _____ 2015 წ.

დამთავრდა „____“ _____ 2015 წ.

თარიღი	პირი რომელსაც ჩაუტარდა ინსტრუქტაჟი	დაბადების წელი	ინსტრუქტაჟის სახეობა	ინსტრუქტორის გვარი, სახელი, თანამდებობა	ხელმოწერა	
					პირი რომელსაც ჩაუტარდა ინსტრუქტაჟი	ინსტრუქტორი
	2	3	4	5	6	7



როგორ მოვიქცეთ ხანძრის დროს

- ❖ ცეცხლის მცირე კერის დანახვისთანავე ჩართეთ სახანძრო სიგნალიზაცია უახლოესი ავარიული ღილაკით და შეეცადეთ ჩააქროთ ცეცხლი ცეცხლმაქრის გამოყენებით;
- ❖ ცეცხლის ძლიერი კერის აღმოჩენის შემთხვევაში ჩართეთ სახანძრო სიგნალიზაცია უახლოესი ავარიული ღილაკის საშუალებით (საჭიროების შემთხვევაში), ხანძრის შესახებ შეატყობინეთ მორიგეს ან ადმინისტრაციას და დაუყოვნებლივ დატოვეთ შენობა, საჭიროების შემთხვევაში ისარგებლეთ საევაკუაციო გასასვლელით.
- ❖ თუ თქვენ არ ხართ ხანძრის კერის აღმომჩენი პირი, ხანძრსაწინააღმდეგო სიგნალიზაციის სირენის ჩართვისთანავე შეეცადეთ დატოვოთ შენობა და გაემართეთ თავშეყრის ადგილისაკენ;
- ❖ ცეცხლის გავრცელების შეზღუდვის მიზნით, შენობის დატოვების დროს შეეცადეთ დახუროთ თქვენს უკან არსებული ფანჯრები და კარები;
- ❖ თუ გადაწყვეტთ, რომ არ დატოვოთ შენობა და თავად შეებრძოლო ცეცხლს, მაშინ აუცილებელია დაიცვათ შემდეგი მოთხოვნები:
 1. უნდა იცოდეთ ცეცხლმაქრის გამოყენების წესები. თუ წესები არ იცით დაუყოვნებლივ დატოვეთ შენობა;
 2. აუცილებლად უნდა შეამოწმოთ არის თუ არა ცეცხლმაქრი სავსე;
 3. თუ თვლით, რომ ცეცხლთან გამკლავება ძნელი იქნება ცეცხლის ჩაქრობის დაწყებამდე აუცილებლად უნდა დარეკოთ სახანძროში (112-ზე);
 4. კოლეჯის დაცვისა და უფლებამოსილი თანამშრომლის მოთხოვნის შემთხვევაში სტუდენტი ვალდებულია დაუყოვნებლივ დატოვოს შენობა.

თუ ხანძრის დროს ვერ ახერხებთ შენობიდან გამოსვლას

- შედით ყველაზე უსაფრთხო ოთახში, დაკეტეთ კარები და კარებთან დააფინეთ სველი ტილო ან სხვა ნაჭერი ისე, რომ მაქსიმალურად შეზღუდოთ ოთახში კვამლის შემოსვლა;
- თუ თქვენსა და ცეცხლის კერას შორის არის ერთი ან რამდენიმე კარი, აუცილებლად დაკეტეთ ყველაკარი;
- იყავით მზად იმისათვის, რომ მოვლენ თქვენს დასახმარებლად და ყური დაუგდეთ შესაბამის სიგნალს;
- თუ კვამლმა შემოაღწია ოთახში, დაწექით იატაკზე, ისუნთქეთ მხოლოდ ცხვირით და სუნთქვისას აიფარეთ ცხვირსახოცი ან სხვა ნაჭერი;
- თუ გადაწყვეტთ გაიაროთ ცეცხლმოკიდებულ ტერიტორიაზე, აუცილებლად დაიფარეთ წინასწარ თავი და თმები, შეიკავეთ სუნთქვა და იმოძრავეთ შეძლებისდაგვარად სწრაფად. მოძრაობისას ეცადეთ მაქსიმალურად დახუჭოთ თვალები;
- სსსმ სტუდენტები აუცილებლად უნდა გავიდნენ ყველაზე უსაფრთხო ოთახში და დაელოდონ დახმარებას ან დახმარება სთხოვონ ადმინისტრაციულ პერსონალს;
- თუ ნახავთ, რომ შენობა ევაკუირებულია ან იქ იმყოფება მხოლოდ ადმინისტრაციული პერსონალი სასწრაფოდ დატოვეთ შენობა. საჭიროების შემთხვევაში ისარგებლეთ საევაკუაციო გასასვლელით;



შენობაში (კოლეჯის შიგნით) გარდა გამოყოფილი ადგილებისა აკრძალულია:

- ✓ სიგარეტის მოწევა;
- ✓ კუსტარული ელექტროგამათბობლებით ან ელექტროგამაცხელებლებით სარგებლობა;
- ✓ ღია ცეცხლით ან ღია ცეცხლის წყაროთი სარგებლობა;
- ✓ საწვავის, ზეთის ან სხვა აალებადი ნივთიერებების შენახვა და სარგებლობა;
- ✓ კოლეჯის წინამდებარე ტერიტორიასთან მისასვლელი გზების ავტომაქანებით ან სხვა საშუალებებით ჩახერგვა.

კოლეჯის სახანძრო უსაფრთხოების უზრუნველყოფის მიზნით დაცული უნდა იყოს შემდეგი მოთხოვნები:

- ✓ შენობაში არსებული ხანძარქრობის პირველადი საშუალებები: ცეცხლსაქრობები და სხვა სახანძრო ინვენტარი უნდა იმყოფებოდეს მუდმივად გამართულ მდგომარეობაში. აღნიშნული ინვენტარის შესანახი სახანძრო კარადები უნდა იყოს დაცვის მუშაკების მეთვალყურეობის ქვეშ მათი მუდმივად გამართულ მდგომარეობაში ფუნქციონირების მიზნით.
- ✓ შენობაში არსებული სამისამართო სახანძრო სიგნალიზაცია, დაკვამლიანების აღმომჩენი მოწყობილობა და სიგნალიზაციის ავარიული მართვის ღილაკები უნდა იყოს მუდმივად გამართულ მდგომარეობაში.

ცეცხლმაქრის გამოყენების ინსტრუქცია

- ❖ ხანძრის შემთხვევაში დარეკეთ ! „112” -ზე , დარეკვა უფასოა.(ადგილობრივი სახანძრო სამსახ. 591 80 16 02)



- ❖ „112“ არის 24-საათიანი საგანგებო სიტუაციების მართვის ცენტრი, სადაც ყველას შეუძლია დარეკოს გადაუდებელი დახმარების მისაღებად.
- ❖ „112“-ზე დარეკვა შესაძლებელია ნებისმიერი სახის ტელეფონიდან, როგორც სახლის ტელეფონიდან ასევე მობილურიდან. 112-ზე დარეკვა უფასოა.
- ❖ 112-ზე დარეკვისას ისაუბრეთ გარკვევით და მშვიდად უთხარით ოპერატორს თქვენი სახელი და ადგილსამყოფელი, არ დაკიდოთ ყურმილი პირველმა.
- ❖ ვებ-გვერდი: www.112.ge